

000000

- प्रधानमंत्री नरेन्द्र मोदी रो चार जुलाई ने जयपुर मेट्रो रेल परियोजना रा दूजा दौर रा काम री सरूआत रो कार्यक्रम।
- मुख्यमंत्री भजन लाल शर्मा पचपदरा रिफाइनरी अर पेट्रोकेमिकल कॉम्प्लेक्स रा काम री प्रगति रो जायजो लेवण सारू आला अहलकारां सागे मीटिंग कीनी।
- प्रदेश रा आंगनबाड़ी केन्द्रां मांय बेगा ई खिलौना बैंक सरू कर्या जावेला।
- देश मांय नान्हा अर दूर-दराज रा शहरां री जनता ताई पासपोर्ट रो सुबीतो पूगावण सारू पासपोर्ट सेवा केन्द्रां रा नेटवर्क मांय लगातार बधोतरी।

0000

मुख्यमंत्री भजनलाल शर्मा आज जयपुर रा सांगानेर विधानसभा हलका मांय विकास रा 631 करोड़ रुपया ऊं बत्ता खर्च वाळा कामां री सरूआत कीनी अर पूरा व्ह्या काम जनता ने सूप्या। ई मौके राख्यी ज्या कार्यक्रम मांय मुख्यमंत्री नाळियां री सफाई सारू सुपर सकर मशीन, कचरो भेळो करण री नुवी मैकेनिकल लिटर पिकर मशीन ने रवाना कीनी। स्वच्छ सर्वेक्षण-2026 रा बारा मांय जाग जगावण रा मकसद ऊं ब्रांडिंग ऑटोरिक्षा ने ई हरी झंडी बता र रवाना कीना। श्री शर्मा पात्र लोगां ने जमीं रा हक वाळा स्वामित्व कार्ड ई दीना। कार्यक्रम मांय मुख्यमंत्री कह्यो के सरकार राजधानी जयपुर रा विकास सारू लगातार काम कर रही है। वे बतायो के प्रधानमंत्री नरेन्द्र मोदी चार जुलाई ने जयपुर मेट्रो रेल परियोजना रा दूजा दौर रा काम री सरूआत करेला।

....

शहरी अर ग्रामीण सेवा शिविरां रो जिक करतां थकां मुख्यमंत्री कह्यो के ऐ शिविर जनता री परेशानियां तुरत आगी करण रा जरिया बण रह्या है।

.....

कार्यक्रम मांय संसदीय कार्य मंत्री जोगाराम पटेल, नगरीय विकास मंत्री झाबर सिंह खर्वा अर जयपुर री सांसद मंजू शर्मा समेत जनता रा केई नुमाइंदा अर मोटी तादाद मांय जनता मौजूद रही।

0000

मुख्यमंत्री भजनलाल शर्मा आज वां रा रहवास माथे अहलकारां सागे मीटिंग कर र पचपदरा रिफाइनरी और पेट्रोकेमिकल कॉम्प्लेक्स रा काम री प्रगति रा बारा मांय विगतवार जाणकारी लीनी। मीटिंग मांय श्री शर्मा कह्यो के प्रधानमंत्री नरेन्द्र मोदी बेगो ई तेल साफ करण रा ई कारखाना रो उद्घाटन करेला। वे कह्यो के पचपदरा रिफाइनरी ऊं राजस्थान देश री ऊर्जा हिफाजत रो मजबूत खम्भो बणबा सागे प्रदेश रो ग्रोथ इंजन साबित व्हेला।

0000

प्रदेश रा आंगनबाड़ी केन्द्रां मांय 3 ऊं 6 साल उम्र ताई रा बच्चां सारू शाला पूर्व गुणवत्तापूर्ण शिक्षा रो खास अभियान चलायी ज्यो है। महिला अर बाल विकास विभाग री ओर ऊं 5 जुलाई ताई चलाया जावण वाळा ई अभियान रा तैत आंगनबाड़ी केन्द्रां माथे खिलौना बैंक खोलण सागे प्रवेशोत्सव अर पौधा रोपण रा कार्यक्रम राख्या जा रह्या है। समेकित बाल विकास सेवा निदेशक वासुदेव मालावत बतायो के 30 जून ताई आंगनबाड़ी कार्यकर्ता अर सहायिका री मदद ऊं घर-घर जा र खिलौना बैंक री जाणकारी दी जावेला। ई सागे ई 3 ऊं 6 साल ताई रा स्कूल नी जा रह्या बच्चां री पिछाण कर र वां रा मायतां ने 1 जुलाई ने आंगनबाड़ी केन्द्रां माथे खिलौना बैंक री सरूआत रा कार्यक्रम सारू न्यौतो दियो जावेला।

000

राजस्थान लोक सेवा आयोग रा कार्यवाहक अध्यक्ष लेफ्टिनेंट कर्नल केसरी सिंह आज जयपुर रा लोकभवन मांय राज्यपाल हरिभाऊ बागडे ऊं शिष्टाचार भेंट कीनी। आयोग रा सदस्य केसरी सिंह ने हाल ही मांय कार्यवाहक अध्यक्ष री जिम्मेदारी संपी ज्यी है।

0000

दि इन्स्टीट्यूट ऑफ चार्टर्ड अकाउन्टेंट्स ऑफ इण्डिया—आईसीएआई मई 2026 मांय लीरीजी सीए इन्टरमीडिएट परीक्षा रा नतीजा रो ऐलान कर दीनो है। परीक्षा मांय डोम्बिवली रा शादुल शेखर विचारे अब्बल रह्या। अभिनव सतीश दूजी अर तीर्थ जैन तीजी ठौड माथे रह्या।

0000

राजस्थान कर्मचारी चयन बोर्ड कृषि पर्यवेक्षक भर्ती परीक्षा 2026 रा नतीजा रो ऐलाण कर दीनो है। बोर्ड रा अध्यक्ष आलोक राज सोशल मीडिया पोस्ट रे ज़रिए ग्राम विकास अधिकारी भर्ती परीक्षा रो मुख्य परिणाम रो ऐलाण ई आज जारी व्हेवण रा आसार जताया। वे बतायो के आज व्ही मीटिंग मांय वी.डी.ओ. भर्ती परीक्षा रा अंतिम परिणाम ने मंजूरी दे दीरीजी।

0000

आज पासपोर्ट सेवा दिवस है। ओ दिन साल 1967 मांय पासपोर्ट कानून लागू व्हेवण री याद मांय मनायो जावे है। इण रो खास मकसद सुरक्षित पासपोर्ट, आसान सेवा अर मजबूत जनता रा संकल्प रो दोहराव है। पासपोर्ट सेवा दिवस रा बारा मांय पेश है समाचार कक्ष ऊं सालेहा गाजी री रपट—

....

पासपोर्ट सेवा केन्द्रां अर डाकघर पासपोर्ट सेवा केन्द्रां री पहुंच लगातार बधायी जा रही है, जिण ऊं नान्हां अर दूर-दराज रा शहरां रा लोगां ने ई आसानी ऊं पासपोर्ट मिल रह्या है। हाल ही मांय व्हा क्षेत्रीय पासपोर्ट अधिकारी सम्मेलन मांय विदेशी मंत्री एस जयशंकर बतायो के देश मांय पासपोर्ट री बधती तादाद उम्मीदां मांय बधोतरी रो दरसाव करे है। माली साल 2025-26 मांय पासपोर्ट री तादाद बध र 138 लाख व्हे ग्यी। वे बतायो के अब पासपोर्ट मुहैया करावण री प्रक्रिया पूरी तरह लोकतांत्रिक है। आ विकसित भारत बणावण रा काम मांय प्रेरणा देवण वाळी खास ताकत रा तौर ऊं काम कर रही है।

000

फौज री ओर ऊं श्रीगंगानगर जिला रा सरहद ऊं लाग्योडा संगराना, 24 अर 25 आरबी गांवां मांय जनता मांय जाग जगावण अर सुरक्षा सहयोग मजबूत करण रा मकसद ऊं वॉरियर्स ऑफ नेशन अवेयरनेस ट्रेनिंग कार्यक्रम चलायी ज्यो है। ई रे जरिये शंका लायक हलचल री जाणकारी फौज ताई पूगावण री प्रक्रिया बतावण अर आपदा री बगत जनता अर फौज बीचे मदद बधावण रा बारा मांय जाणकारी दी जा रही है। ओ कार्यक्रम 30 जून ताई चलेला।

0000

डीग ज़िला रा कामां हलका मांय आज एक तेज जा रही कार करीब 10 जणां ने टक्कर मार दीनी। कार री फेंट मांय आया लोग तीर्थराज विमलकुण्ड री परिक्रमा कर पैदल जा रह्या हा। ज़ख्मी लोगां ने कामां रा सरकारी अस्पताल मांय भर्ती करायी ज्या, जठै ऊं घणा ज़ख्मी पांच जणां ने भरतपुर रा आरबीएम सफाखाना मांय भेज दिया ज्या। कार चलावण वाळो मौका ऊं फरार व्हे ग्यो।

0000

प्रदेश रा केई हलकां मांय चौमासा ऊं पैली री बिरखा व्हेवण ऊं गर्मी ऊं साता मिली है। जल संसाधन विभाग ऊं मिली जाणकारी रे मुजब ई महीना मांय हाल ताई राज्य रा तीन जिलां मांय बत्तो, तीन मांय सामान्य अर नौ जिलां मांय सामान्य ऊं कम मेह बरस्यो। मौसम विभाग आज ई 20 जिला मांय गरज-चमक सागे बरसात व्हेवण सारू चेतायो है। महकमा रे मुजब उदयपुर रे अलावा बाकी संभागां मांय काल ई कठे-कठे आंधी-बारिश रा आसार है। 28 जिलां मांय यलो अर श्रीगंगानगर, चूरू अर बीकानेर जिलां मांय बरसात रो ऑरेंज अलर्ट जारी करी ज्यो है। ई बीचे आज हनुमानगढ मांय दोपहरां पाछे मौसम पलट ग्यो। म्हाणी खबरनवीस बतायो के वठे मोकळो धूळो उड्यो।

0000

आज बूंदी ज़िला रो 785वों स्थापना दिवस मनायी ज्यो। ई मौके ज़िला प्रशासन अर पर्यटन विभाग री ओर ऊं भांत-भांत रा कार्यक्रम राख्यी ज्या। ई मौके ऐतिहासिक गढ पैलेस मांय शहनाई बजावण अर गणेश पूजन रा कार्यक्रम राख्यी ज्या। स्थापना दिवस रा सिलसिला मांय देशी-परदेशी सैलानियां ने खास स्मारकां मांय मुफ्त दाखिलो दियो ज्यो।

0000

हॉकी इंडिया 5 ऊं 14 जुलाई ताई ब्रिटेन दौरा सारू 24 सदस्यां वाळी जूनियर महिला टीम रो ऐलाण कर दीनो है। खैदेम शिलेमा चानू टीम री कप्तान बणायी ज्यी है। भारत री टीम नुवा कोच

टिम व्हाइट री अगुवाई मांय जूनियर एशिया कप समेत आवती अंतरराष्ट्रीय होड़ां री तैयारी रा सिलसिला मांय स्कॉटलैंड अर इंग्लैंड मांय सात मैच खेलेला।

0000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम “मन की बात” मांय 28 जून ने विचार बतावेला। आ ई कार्यक्रम री 135वीं कड़ी व्हेला। ई सारू आप ई मुफ्त नम्बर 1800-11-7800 माथे 26 जून तांई राय दे सको हो। नरेन्द्र मोदी एप अर माय जीओवी ओपन फोरम रे जरिए ई विचार भेज्या जा सके है।

0000